

四庫全書

史部

欽定四庫全書

歷代名臣奏議卷三百十七

明 楊士奇等 撰

弭盜

漢武帝時東郡盜起丞相公孫弘奏言民不得挾弓弩
十賊曠弩百吏不敢前曠音郭引滿曰曠盜賊不輒伏辜免脫

者衆害寡而利多此盜賊所以蕃也禁民不得挾弓弩
則盜賊執短兵短兵接則衆者勝以衆吏捕寡賊其執

必得盜賊有害無利則莫犯法刑錯之道也臣愚以為
禁民毋得挾弓弩便上下其議光祿大夫吾丘壽王對
曰臣聞古者作五兵非以相害以禁暴討邪也

五兵謂
矛戟弓

劍

安居則以制猛獸而備非常有事則以設守衛而施

行陣及至周室衰微上無明王諸侯力政彊侵弱衆暴
寡海內抗敝巧詐並生

抗鉞盡也
五官反

是以知者陷愚勇者

威怯苟以得勝為務不顧義理故機變械飾所以相賊
害之具不可勝數於是秦無天下廢王道立私議滅詩

書而首法令去仁恩而任刑戮墮名城殺豪桀

墮火規反

銷

甲兵折鋒刃其後民以擾鉏耰挺相撻擊犯法滋衆盜賊不勝至於赭衣塞路羣盜滿山卒以亂亡故聖王務教化而省禁防知其不足恃也今陛下昭明德建太平舉俊材興學宮三公有司或由窮巷起白屋裂地而封宇內日化方外鄉風然而盜賊猶有者郡國二千石之罪非挾弓弩之過也禮曰男子生桑弧蓬矢以舉之明示有事也

有四方扞禦之事

孔子曰吾何執執射乎大射之禮

自天子降及庶人三代之道也詩云大侯既抗弓矢斯

張射夫既同獻爾發功言貴中也

中竹仲反

愚聞聖王合射

以明教矣未聞弓矢之為禁也且所謂禁者為盜賊之

以攻奪也攻奪之罪死然而不止者大姦之於重誅固

不避也臣恐邪人挾之而吏不能止良民以自備而抵

法禁

抵觸也

是擅賊威而奪民救也竊以為無益於禁姦

而廢先王之典使學者不得習行其禮大不便書奏上

以難丞相弘弘詘服焉

宣帝時渤海左右郡歲飢盜賊並起二千石不能禽制
上選能治者丞相御史舉龔遂可用上以為渤海太守
時遂年七十餘召見形貌短小宣帝望見不副所聞心
內輕焉謂遂曰渤海廢亂朕甚憂之君欲何以息其盜
賊以稱朕意遂對曰海瀕遐遠不霑聖化其民困於飢
寒而吏不恤故使陛下赤子盜弄陛下之兵於潢池中
耳今欲使臣勝之邪將安之也上聞遂對甚說答曰選
用賢良固欲安之也遂曰臣聞治亂民猶治亂繩不可

急也唯緩之然後可治臣願丞相御史且無拘臣以文
法得一切便宜從事上許焉加賜黃金贈遣乘傳至渤
海界

張敞以勃海膠東盜賊並起上書自請治之曰臣聞忠
孝之道退家則盡心於親進宦則竭力於君夫小國中
君猶有奮不顧身之臣況於明天子乎今陛下遊意於
太平勞精於政事疊疊不舍晝夜羣臣有司宜各竭力
致身山陽郡戶九萬三千口五十萬以上訖計盜賊未

得者七十七人它課諸事亦略如此臣敞愚騫既無以
佐思慮久處閒郡身逸樂而忘國事非忠孝之節也伏
聞膠東勃海左右郡歲數不登盜賊並起至攻官寺篡
囚徒搜市朝劫列侯吏失綱紀姦軌不禁臣敞不敢愛
身避死唯明詔之所處願盡力摧挫其暴虐存撫其孤
弱事即有業所至郡條奏其所由廢及所以興之狀書
奏天子徵敞拜膠東相賜黃金五十斤敞辭之官自請
治劇郡非賞罰無以勸善懲惡吏追捕有功效者願得

壹切比三輔尤異天子許之

王莽以璽書令卜者田況領青徐二州牧事況上言盜賊始發其原甚微非部吏伍人所能禽也咎在長吏不為意縣欺其郡郡欺朝廷實百言十實千言百朝廷忽畧不輒督責遂至延曼連州乃遣將率多發使者傳相監趣郡縣力事上官應塞詰對共酒食具資用以救斷斬不給復憂盜賊治官事將率又不能躬率吏士戰則為賊所破吏氣寔傷徒費百姓前幸蒙赦令賊欲解散

或反遮擊恐入山谷轉相告語故郡縣降賊皆更驚駭
恐見詐滅因飢饉易動旬月之間更十餘萬人此盜賊
所以多之故也今雒陽以東米石二千竊見詔書欲遣
太師更始將軍二人爪牙重臣多從人衆道上空竭少
則亡以威示遠方宜急選牧尹以下明其賞罰收合離
鄉小國無城郭者徙其老弱置大城中積藏穀食并力
固守賊來攻城則不能下所過無食執不得羣聚如此
招之必降擊之則滅今空復多出將率郡縣苦之反甚

於賊宜盡徵還乘傳諸使者以休息郡縣委任臣況以
二州盜賊必平定之

東漢安帝即位以後頻遭元二之厄

元二即元也

百姓流亡

盜賊並起郡縣更相飾匿莫肯糾發

更相文飾隱匿也

尚書陳

忠獨以為憂上疏曰臣聞輕者重之端小者大之源故

隄潰蟻孔氣洩鍼芒是以明者慎微智者識幾書曰小

不可不殺詩云無縱詭隨以謹無良蓋所以崇本絕末

鉤深之慮也臣竊見元年以來盜賊連發攻亭劫掠多

所傷殺夫穿窬不禁則致彊盜彊盜不斷則為攻盜攻

盜成羣必生大姦故亡逃之科憲令所急至於通行飲

食罪致大辟

通行飲食猶過致資給與同罪也飲音蔭食音寺

而頃者以來莫

以為憂州郡督錄怠慢長吏防禦不肅皆欲採獲虛名

諱以盜賊為負雖有發覺不務清澄至有逞威濫怒無

辜僵仆或有跼蹐比伍轉相賦斂或隨吏追赴周章道

路是以盜發之家不敢申告隣舍比里共相壓迫

迫也

或出私財以償所亡其大章著不可掩者乃肯發露陵

遲之漸遂且成俗寇攘誅咎皆由於此前年勃海張伯
路可為至戒覆車之軌其迹不遠蓋失之末流求之本
源宜紂增舊科以防來事自今彊盜為上官若它郡縣

所紂覺一發部吏皆正法

上官謂郡府也若及也部吏謂督郵掾儼也正法依法也

尉貶秩一等令長三月奉贖罪二發尉免官令長貶秩
一等三發以上令長免官便可撰立科條處為詔文切
勅刺史嚴加紂罰冀以猛濟寬驚懼姦慝頃季夏大暑
而消息不協寒氣錯時水涌為變天之降異必有其故

所舉有道之士可策問國典所務王事過差令處煖氣不效之意庶有讜言以承天誠

桓帝時零陵桂陽山賊為害公卿議遣討之又詔下州郡一切皆得舉孝廉茂才尚書陳蕃上疏駁之曰昔高祖創業萬邦息肩撫養百姓同之赤子今二郡之民亦陛下赤子也致令赤子為害豈非所在貪虐使其然乎宜嚴勅三府隱覈牧守令長其有在政失和侵暴百姓者即便舉奏更選清賢奉公之人能班宣法令情在愛

惠者可不勞王師而羣賊弭息矣又三署郎吏二千餘人三府掾屬過限未除但當擇善而授之簡惡而去之豈煩一切之詔以長請屬之路乎以此忤左右故出為豫章太守

靈帝時鉅鹿張角偽託大道妖惑小民侍御史劉陶與奉車都尉樂松議郎袁貢連名上疏曰聖王以天下耳目為視聽故能無不聞見今張角支黨不可勝計前司徒楊賜奏下詔書切勅州郡護送流民會賜去位不復

捕錄雖會赦令而謀不解散四方私言云角等竊入京師覘視朝政烏聲獸心私共嗚呼州郡忌諱不欲聞之但更相告語莫肯公文宜下明詔重募角等賞以國土有敢回避與之同罪帝殊不悟方詔陶次第春秋條例明年張角反亂海內鼎沸帝思陶言封中陵鄉侯後魏孝文帝問止盜之方秘書令高祐曰昔宋均樹德害獸不過其鄉卓茂善教蝗蟲不入其境彼盜賊者人也苟訓之有方寧不易息當須宰守貞良則盜止矣

宣武帝永平四年河南尹甄琛上表曰國家居代患多盜竊世祖廣置主司里宰多置吏士為其羽翼始得禁止遷都已來四遠赴會五方雜沓寇盜公行里正職輕任碎多是下才不能督察請少高其品選下品中應遷者進而為之詔從之琛又奏以羽林為游軍於諸坊巷司察盜賊於是洛城清靜後常踵焉

隋文帝開皇四年上以隴西頻被寇掠而俗不設村塢命將軍賀婁子幹勒民為堡仍營田積穀子幹上書曰

隴西河右土曠民稀邊境未寧不可廣佃比見屯田之所獲少費多虛役人功卒逢踐暴且隴右之民以畜牧為事若更屯聚彌不自安但使鎮戍連接烽堠相望民雖散居必謂無慮隋主從之

煬帝大業十二年帝問侍臣盜賊翊衛大將軍宇文述曰漸少納言蘇威引身隱柱帝呼問之對曰臣非所司不委多少但患漸近帝曰何謂也威曰他日賊據長白山今近在汜水且往日租賦丁役今皆何在豈非其人

皆化為盜乎比見奏賊皆不實遂使失於支計不時翦除又昔在雁門許罷征遼今復徵發賊何由息帝不悅頃之帝問威以伐高麗事威欲帝知天下多盜對曰今茲之役願不發兵但赦羣盜自可得數十萬遣之東征高麗可滅帝不懌

唐太宗即位之初上與羣臣論止盜或請重法以禁之上曰朕當去奢省費輕徭薄賦選用廉吏使民衣食有餘則自不為盜安用重法邪自是數年之後海內升平

路不拾遺外戶不閉商旅野宿焉

穆宗即位韓愈論黃家賊事宜狀其一曰臣去年貶嶺外刺史其州雖與黃家賊不相隣接然見往來過客并語知嶺外事人所說至精至熟其賊並是夷獠亦無城郭可居依山傍險自稱洞主衣服言語都不似人尋常亦各營生急則屯聚相保比緣邕管經畧使不得人德既不能綏懷威又不能臨制侵欺虜縛以致怨恨蠻夷之性易動難安遂至攻劫州縣侵暴平人或復私讐或

貪小利或聚或散終亦不能為事近者征討本起於襄
行立陽旻此兩人者本無遠慮深謀意在邀功求賞亦
緣賊未屯聚之時將謂單弱立可摧破爭獻謀計惟恐
後時朝廷信之遂允其請自用兵已來已經二年前後
所奏殺獲計不下一二萬人儻皆非虛賊已尋盡至今
賊猶依舊足明欺罔朝廷邕容兩管因此凋弊殺傷疾
患十室九空百姓怨嗟如出一口陽旻行立相繼身亡
實由自邀功賞造作兵端人神共嫉以致殃咎陽旻行

立事既已往今所用嚴公素者亦非撫御之才不能別立規模依前還請攻討如此不已臣恐嶺南一道未有寧息之時其二曰昨者併邕容兩管為一道深合事宜然邕州與賊逼近容州則甚懸隔其經畧使若置在邕州與賊隔江對岸兵鎮所在物力必全一則不敢輕有侵犯一則易為逐便控制今置在容州則邕州兵馬必少賊見勢弱易生姦心伏請移經畧使於邕州其容州但置刺史實為至便其三曰比者所發諸道南討兵馬

例皆不諳山川不伏水土遠鄉羈旅疾疫殺傷臣自南來見說江西所發共四百人曾未一年其所存者數不滿百岳鄂所發都三百人其所存者四分纔一續添續死每發倍難若令於邕容側近召募添置千人便割諸道見供行營人數糧賜均融充給所費既不增加而兵士又皆便習長有守備不同客軍守則有威攻則有利其四曰自南討以來賊徒亦甚傷損察其情理厭苦必深大抵嶺南人稀地廣賊之所處又更荒僻假如盡殺

其人盡得其地在於國計不為有益容貸羈縻比之禽獸來則捍禦去則不追亦未虧損朝廷事勢以臣之愚若因改元大慶赦其罪戾遣一郎官御史親往宣諭必望風降伏謹呼聽命仍為擇選有材用威信諳嶺南事者為經畧使處理得宜自然永無侵叛之事

宣宗大中元年雞山羣盜寇掠果州及巴南妖賊言辭悖慢上怒甚崔鉉曰此皆陛下赤子迫於飢寒盜弄兵於谿谷間不足辱大軍但遣一使者可平矣乃遣京兆

少尹劉潼招諭之潼言使之歸命其勢甚易所慮者武臣耻不戰之功議者責欲速之效耳

宋真宗咸平三年濮州盜夜入城畧知州王守信監軍王順度知黃州王禹偁聞而奏疏曰伏以體國經野王者保邦之制也易曰王公設險以守其國自五季亂離各據城壘區分瓜剖七十餘年太祖太宗削平僭偽天下一家當時議者乃令江淮諸郡毀城隍收兵甲撤武備者二十餘年書生領州大郡給二十人小郡減五人

以充常從號曰長吏實同旅人名為郡城蕩若平地雖則尊京師而抑郡縣為強幹弱枝之術亦匪得其中道也臣比在滁州值發兵挽漕關城無人守禦止以白直代主開閉城池頽圯鎧仗不完及徙維揚稱為重鎮乃與滁州無異嘗出鎧甲三十副與巡警使臣穀弩張弓十損四五蓋不敢擅有修治上下因循遂至於此今黃州城池器甲復不及滁揚萬一水旱為災盜賊竊發雖思禦備何以枝梧蓋太祖削諸侯跋扈之勢太宗杜僭

偽覬望之心不得不尔其如設法救世久則弊生救弊之道在乎從宜疾若轉規固不可膠柱而鼓瑟也今江淮諸州大患有三城池墮圯一也兵仗不完二也軍不服習三也濮賊之興慢防可見望陛下特紓宸斷許江淮諸郡酌民戶衆寡城池大小並置守捉軍士多不過五百人閱習弓劍然後漸葺城壁繕完甲冑則郡國有禦侮之備長吏免剽畧之虞矣疏奏上嘉納之

仁宗慶厯三年知諫院歐陽修上奏曰臣近因軍賊王

倫等事累有論奏為天下空虛全無武備指陳隋唐亡國之監皆因兵革先興而盜賊繼起不能撲滅遂至橫流又見國家綱紀隳頽法號寬弛賞罰不立善惡不分體量勢危可憂可懼欲乞朝廷講求禦賊之術峻行責下之法兼聞搢紳之內憂國者多皆論盜賊事臣但謂朝廷見已形之患聞衆多之言必動於心畧知恐懼及聞樞密院戒勵進奏官不使外人知事方認兩府厭苦獻言之人又見自和州奏破王倫之後更不講求禦賊

之策又認上下已有偷安之意殊不知前賊雖滅後賊更多今建昌軍一火四百人桂陽監一火七十人草賊一火百人其餘池州解州鄧州南京等處各有強賊不少皆建旗鳴鼓白日入城官吏遙迎飲食宴樂其敢如此者蓋為朝廷無賞罰都不足畏盜賊有生殺時下須從臣恐上下因循日過一日國家政令轉弱盜賊威勢轉強使畏賊者多向國者少天下之勢從此去矣竊聞京西提點刑獄張師錫為部內使臣與賊同坐喫酒及

巡檢縣尉不肯用心曾有論奏其言甚切臣舊識師錫
其人恬靜長者遲緩優柔不肯生事今尚有此奏則臣
謂天下無賢愚皆為國家憂之獨不憂者朝廷尔嗟夫
古之智士能慮未形之機今之謀臣不識已形之禍以
患為樂以危為安盜賊雖多而時有敗者遂生玩寇之
意見言事者衆而聽之已熟遂有忽人之心臣近曾求
對便殿伏蒙陛下語及賊事憂形于色及退見宰輔從
容閒暇天下之事深可憂矣今桂陽建昌軍賊數不少

想其害為尤甚王倫在於遠處更不留意今自京發兵則道遠不及外處就撥則處處無兵欲乞嚴勅大臣鑒已成難救之意速講定禦盜之法兵行天下使四方漸為備禦攻守擘畫剪撲諸處見在賊數自有賊已來群臣上言者皆為自來寬法致不肯用心捉賊皆乞峻行法令近見池州官吏各只有罰銅五斤及知言者皆不蒙納臣謂大臣為國計者寧厭忠言之多不厭盜賊之多乃如此行事臣前後上言賊事文字不少仍乞類聚

擇其長者講定法制陛下欲知大臣不肯峻國法以繩官吏蓋由陛下不以威刑責大臣此乃社稷安危所係陛下之事也伏望留意而行之

修論禦賊四事劄子曰臣昨自軍賊王倫敗後尋曾極言論列恐相次盜賊漸多乞朝廷早為禦備凡為國家憂盜賊者非獨臣一人前後獻言者甚衆皆為大臣忽弃都不施行而為大臣者又無譬畫果致近日諸處盜賊縱橫自淮海已南而新遭王倫之後今自京以西州

縣又遭張海郭貌山等劫掠焚燒挂陽監昨奏蠻賊數百人變峽荆湖各奏蠻賊皆數百人解州又奏見有未獲賊十餘火滑州又聞強賊三十餘人燒却沙彌鎮許州又聞有賊三四十人劫却堪澗鎮此臣所聞目下盜起之處如此縱橫也此外京東今歲自秋不雨至今麥種未得江淮倫賊之後繼以飢蝗陝西災旱道路流亡日夜不絕似此等處將來盜賊必起是見在者未滅續來者愈多而乾象變差謹告不一於古占法多云天下

大兵並起今兵端已動於下天象又告於上而朝廷安恬舒緩無異常時此臣前狀所謂古之智者能慮未形之機今之謀臣不識已形之禍者也臣聞兩漢之法凡盜賊並起人民流亡天文災異如此等事皆責三公或被誅戮或行黜放今幸陛下仁聖寬慈大臣偶免重責而猶忘忽禍患偷習因循此臣所謂大臣不肯峻國法以繩官吏蓋由陛下不以威刑責大臣者也今見在賊已如此後來賊必更多若不早圖恐難後悔臣計方今

禦盜者不過四事一曰州郡置兵為備二曰選捕盜之官三曰明賞罰之法四曰去冗官用良吏以撫疲民使不起為盜此四者大臣所忽以為常談者也然臣視今朝廷於四者未有一事合宜伏望聖慈嚴勅兩府大臣問其捨此四事別有何術可為苟無他術則此四者宜早施行臣竊聞州郡置兵富弼已有條奏其餘三事前後言事者議論甚多伏乞合聚羣議擇其善者而行其禦盜四事方今措置乖失極多容臣續具一二條奏

修論京西賊事劄子曰臣竊聞近日張海郭貌山與范三等賊勢相合轉更猖狂諸處奏報日夕不絕伏惟聖慮必極憂勞不聞廟謀有何處置臣竊見朝廷作事常有後時之失又無慮遠之謀患到目前方始倉忙而失措事纔過後已却弛慢而因循昨王倫暴起京東轉攻淮甸橫行千里旁若無人既於外處無兵須自京師發卒孫惟忠等未離都下而王倫已至和州矣賴其天幸偶自敗亡然而驅殺軍民焚燒城市瘡痍塗炭毒遍生

靈此州郡素無守備而旋發追兵誤事後時之明驗臣
謂朝廷因此必悔前非須有更改以防後患而自王倫
敗後居兩府者了無擘畫有上言者又不施行上下拖
延日過一日遂致張海郭貌山等又起京西攻劫州縣
橫行肆毒更甚王倫依前外處無兵又自京師發卒臣
聞張海是李宗火內惡賊郭貌山在商山已及十年其
驍勇兇姦不比王倫偶起之賊縱使官兵追及亦其勝負
未知天下之憂恐自此始臣亦知近日臣寮上言賊事

者甚衆竊慮兩府進呈文字之時必須奏言已差使臣
選兵追捕將此拙計便為廟謀上寬聖懷苟自塞責張
海等二百餘人盡有甲馬日行一二百里馬力困乏則
弃別奪民間生馬乘騎竊科官兵必難追逐縱使追兵
能及生靈已受其殃此度賊雖能平後患豈可不慮以
今四方盜起所在各要隄防則臣前所言禦賊四事之
中州縣置兵最為急務伏望陛下憫此生民見受屠戮
之苦不聽迂儒遲緩悞事之言其州縣置兵事件富弼

已有起請伏乞決於宸意速與施行

修再論置兵禦賊劄子曰臣近為張海等賊勢猖狂曾
上言禦賊四事內一件州郡置兵為備風聞朝議已依
富弼起請施行其餘三事一乞選捕盜官二乞定賞罰
新法三乞按察老病貪贓之官此三事至今未聞擬議
臣伏見去年朝廷於諸道州府招宣毅兵士及添置鄉
兵弓手當時騷擾次第不小本要為州縣禦賊之備及
一旦王倫張海等相繼而起京東淮南江南陝西京西

五六路二三十州軍數千里內殺人放火肆意橫行入州入縣如入無人之境則去年所置宣毅兵鄉兵弓手等盡皆何在無一處州縣得力者蓋由官吏不得其人賞罰無法而所置宣毅鄉兵弓手皆不堪使用所以張皇騷擾空有為備之名而無為備之用今朝廷雖依富弼起請令州郡置兵若不先擇官吏嚴立法令則依前置得不堪使用之兵空有其名終不濟事故臣謂必欲州郡置得精兵則須採臣所陳三事一一施行方可集

事其州縣官吏悞事臣請試言京西一兩處則其他可知郢州知州王昌運老病腰腳行動不得每日令二人扶出坐衙三年之內州政大壞臨替得一比部員外郎劉依交代其劉依亦是七十餘歲昏昧不堪昨在滑州寄居臣為通判三四度來看臣每度問臣云中書有一王參政名甚如此不知人事陛下試思如此等人能為國家置兵禦賊乎今汝州知州鮑亞之是三司以不才東退者鄧州知州朱文郁是轉運使中不材選退者二

人老懦不才如此等。人能為國家置兵禦賊乎。陛下欲知全盛之世盜賊便敢如此者。蓋為處處官吏非人。故臣前後累言。乞按察冗濫之官者。蓋為恐有此事也。兩府之議不肯於無事之時先為禦備。直待打破一州。方議換知州。打破一縣。方議換縣令。其餘未經打破州縣。一任老病貪繆之官壞之。臣謂是大臣不欲以身當怨之過也。今天下生民獲安樂。則皆須上感陛下聖德。若其父子殺戮離散不安。則亦必歸怨陛下。今大臣不肯

澄汰蓋避百十人官吏怨其身寧使百萬蒼生塗炭而
怨國家今盜賊一年多於一年一火強於一火天下禍
患豈可不憂伏望聖明特出睿斷如必行州郡置兵之
法則先須慎擇官吏免致虛為騷擾反更害民臣前後
三次乞案官吏況國家自來每有災傷路分累曾遣使
安撫豈於今日視民如此塗炭頓以遣使為難願陛下
力主而行之則天下幸甚

修論募人入賊以壞其黨劄子曰臣竊聞京西賊盜日

近轉多在處縱橫不知火數所患者素無禦備不易枝
梧然獨幸賊雖猖狂未有謀畫若使其得一曉事之人
教以計策不掠婦女不殺人民開官庫之物以振貧窮
招愁怨之人而為黨與況今大臣不肯行國法州縣不
復畏朝廷官吏尚皆公然迎奉疲民易悅豈有不從若
兇徒漸多而不暴虐則難以常賊待之可為國家憂矣
以此思之賊衆雖多尚可力破使有一人謀主卒未可
圖臣前因王倫賊時曾有起請十餘事內一件乞出榜

招募諸處下第舉人及山林隱士負犯流落之人有能以身入賊筭殺首領及設計誤賊陷於可敗之地者優與酌獎所貴亮黨懷疑不納無賴之人以為謀主當時議者頗以為然伏乞採臣此意速降指揮與杜杞令所在張榜使賊聞知所貴投賊之人懷疑不納但無謀主尚可剪除又論宜專責杜杞捕賊劄子曰臣伏見昨張海等賊勢初盛之時京西未有得力官吏遂自朝廷差臺官蔡稟催督捉殺後來已別選杜杞充京西轉運使

委以一路之事並近日差出兵馬甚多分為頭項不少
部分進退須要統一指縱號令不可二三竊慮杜杞蔡
稟不相叶同各出異見凡指揮諸事使諸將難從一失
事機反成敗蹤自兵士差出今已多時然未聞奏報與
賊鬪敵及殺獲次第竊慮官兵互相迴避空作往來或
恐進退之間號令不一致茲逗遛未見成功今雖賊奏
稍稀然亦未見殺獲之數困獸猶鬪不可不虞寇死命
窮恐未易敵合早除剪仍須督責況蔡稟是應急差出

杜杞乃選材用之責任之間宜專在杞兼聞蔡稟自到京西處置多未合宜近聞欲加一巡檢致得兵士喧噪幾至生變苟或如此張皇竊恐別致生事其蔡稟伏乞早賜指揮抽回只委杜杞一面催促庶得專一早能了當

修論捕賊賞罰劄子曰臣伏見方今天下盜賊縱橫王倫張海等所過州縣縣尉巡檢有迎賊飲宴者有獻其器甲者有畏懦走避者有被其驅役者朝廷於此憂賊

之時正患乏人之際或於巡檢縣尉之內得一捕賊可
使之人則必須特示旌酬以行激勵苟或未能者猶須
懸賞以待之何況有而失賞伏見吏部選人區法自出
身以來兩任縣尉初任臨江軍新淦縣三年之內大小
賊盜獲四十餘火內雖小盜數多其如強劫羣賊亦不
為少據於賞格合改京官而有司守纖細之文執尋常
之例謂其所獲雖為全火而不同時因不與理為勞績
臣料天下州縣盜賊之多無如新淦天下縣尉能捉賊

之多亦無如區法又聞法次任吉水縣尉使其縣民結
為伍保至今吉水一縣全無盜賊民甚便之法為縣尉
官至卑賤所至之處皆有可稱臣思朝廷非不欲賞善
罰惡以行勸戒而患於有司法弊拘守常文致抑才能
失於旌賞其區法偶與臣相識因得知之然人所不知
抑而不申者何可勝數竊以盜賊是方今急患縣尉方
今切要之人皆朝廷常合留意之事臣輒有起請事件
具畫一于後

一選人區法捕賊之効甚多但為有司拘守細碎之文不理勞績其人已升得職官伏乞追取本人歷子別加考驗如實有勞能即乞不拘常格特與酬獎以勸後來

一臣謂天下羣盜縱橫皆由小盜合聚今但患其大而不防其微故必欲止盜先從其小能絕小盜者巡檢縣尉也然而賞罰之法其弊極多只如捕盜去惡但要淨盡豈必須是一日之內同時捕獲假

如有全火強賊縣尉巡檢以死命鬪敵若於兩日
內捉盡已不理為勞績其守文之弊如此極多欲
乞下銓司重定捕賊賞格施行

一臣伏見自天下有盜賊以來議者多陳禦盜之策
皆欲使民結為伍保則姦惡不容今區法於吉水
縣立伍保之法三年之內刼賊不敢入其縣界臣
欲乞特降指揮下江南西路體量吉水縣自區法
創立伍保之法以來如實全無刼賊又民間以為

便利即乞頒行伍保之法於天下

四年修論湖南蠻賊可招不可殺疏曰臣風聞楊畋近與蠻賊鬪敵殺得七八十人首級仍聞入彼巢穴奪其糧儲挫賊之鋒增我士氣畋之勇畧固亦可嘉然朝廷謀慮事機宜思久遠竊恐上下之心急於平賊聞此小捷便形虛喜不能鎮靜外示輕脫其間二事尤合深思一曰不待成功便行厚賞二曰謂其可殺更不肯招苟或如此則計之大失而事之深害也今湖南捕賊者殺

一人頭賞錢十千官軍利賞見平人盡殺平人驚懼盡起為盜除鄧和尚李花脚等數十頭項外其餘隨大小成火者不可勝數今畋所擊只一洞所聚已二千餘人於二十人中殺七八十人是二十分之一其餘時暫鳥散必須復集臣見自古蠻蜚為害者不聞盡殺須是招降昨緣邵飾等失信於黃捉鬼遂恐更難招誘今若因畋小勝示以恩威正是天與招服之機不可失也若令畋自作意度招取大頭項者因此小勝傳布捷聲其餘

諸處結集者分行招誘藉此聲勢必可盡降旬日之間
湖南定矣若失此時漸向夏熱以我所病之兵當彼慣
習水土之賊小有敗衄則彼勢復堅不惟為害湖南必
慮自此貽朝廷憂患今於未了之間便行厚賞則諸處
巡檢捕賊官等見畋獲賞爭殺平人而畋等自恃因戰
得功堅執不招之議朝廷亦恃畋小勝更無招輯之心
上下失謀必成大患其楊畋等伏乞且降勅書獎諭授
與事宜俟彼招安便行厚賞今湖南賊數雖多然首惡

與本賊絕少其餘盡是枉遭殺戮逼脅為盜之徒在於人情豈忍盡殺惟能全活人命多者則其功更大仍乞明說此意諭與楊畋其賞典乞少遲留庶合事體

修又上疏曰臣風聞湖南蠻賊近日漸盛殺戮官吏鋒不可當新差楊畋銳於討擊與郭輔之異議不肯招降又王絲去時朝廷亦別無處分慮絲到彼與畋同謀蓋蠻賊只可招攜卒難剪撲而畋等急於展効恐失事機今深入而攻則山林險惡巢穴深遠議者皆知其不可

若以兵外守待其出而擊之則又未見其利也蓋以蠻所依山在衡州永州道州桂陽監之間四面皆可出寇若官兵守於東則彼出於西官兵守於南則彼出於北四面盡守則用兵太多分兵而邀之則兵寡易敗此進退未有可擊之便也今蠻氏正蠻已為鄧和尚黃捉鬼兄弟所誘其餘山民莫徭之類亦皆自起而為盜竊聞常寧一縣殆無平民大小之盜一二百火推其致此之因云莫徭之俗衣服言語一類正蠻黃鄧初起之時捕

盜官吏急於討擊逢蠻便殺屢殺平人遂致莫徭驚惶
至此以此而言則本無為盜之心固有可招之理然欲
諸盜肯降必須先得黃鄧昨邵飾等初招黃捉鬼之時
失於恩信致彼驚逃尋捕獲之斷其脚筋因而致死今
鄧和尚等若指前事為戒計其必未輕降如云且招終
恐難得必須示以可信之事推以感動之恩若得黃鄧
先降其餘指麾可定今深入而攻既不可待其出而擊
之又不可且殺且招又不可以臣思之莫若罷兵曲赦

示信推恩庶幾招之可使聽命臣亦廣詢南方來者云
我若推信彼不難招鄧和尚等大則希一班行其次不
過殿侍足矣正蠻叛者得一團主之名亦足矣莫徭之
類使安耕織而歲輸皮粟得為平民乃彼大幸不徒足
志而已今若擊之不已則其為害愈深沉漸近夏暑雨
方燁溼士卒不習水土須慮死傷仍恐迫之大急則潭
榔全邵諸寨向化之蠻皆誘脅而起則湖南一路可為
國家之憂臣欲乞速令兩府大臣深究招殺之利害共

思長策決定廟謀若遷延後時致彼猖獗不幸官吏頻遭殺害則朝廷之體難為屈法而招彼以其罪既多必恐不能自信則兵久不解害未有涯伏望聖明斷之在早

慶厯三年右正言余靖論禦盜之策莫先安民疏曰臣竊見陝西京西京東淮南荆湖等路各有群賊大者數百人小者三五十人剽劫州縣恣行殺伐官吏罷軟望風畏懼如張海等輩日肆猖狂逐處州軍為備者唯能

乞師以自防援此蓋軍政久弛又少良吏故小有寇盜則上煩朝廷伏見近日遴擇才臣為諸路轉運使提點刑獄等將令上下相維謹於伺察去貪殘之吏撫疲瘵之民此誠求治之本也然臣愚慮思之自數年以來寇賊為害幸而起於軍伍烏合成羣百姓尚懷其生不相應和茲乃國家自祖宗以來輕徭薄賦以結人心至於此也臣聞孟子曰推恩足以保四海不推恩無以保妻子此古今之通論也國家西陲用兵以來經費漸廣故

言利之臣日進其術不以安民為意者多矣惟陛下察之大抵民有蓄積能自充足則隣里親戚共相守衛不忍弃其安逸以就死若朝廷畧加存撫則不失其所凡今之所以害於農者謬官狡吏兼并之家游手之人乘國家賦斂猝暴而射其利以耗其蓄聚也今又加以賊盜驚擾廢其耕桑若皆失業困窮而共為盜則黃巾赤眉之患可憂矣故朝廷尤宜急撫之也夫州郡之兵多則食不充少則不足自衛裁當今之所宜唯兼濟而後

可若使朝廷遴擇長吏長吏擇捕盜之官巡檢得自募
勇力之士嚴捕賊之令重捕賊之賞賊無不破矣安民
之術則但不奪其時不傷其財能禁其為非而去其為
惡者則皆安堵矣故盜賊之勢不可使其滋蔓唯先求
安民之術而已矣欲民之安者在乎謹改作勿爭其利
而已矣國家不謹改作而與民爭尋常之利者臣別具
條奏

樞密副使富弼乞諸道置兵以備寇盜疏曰臣竊聞知

金州比部員外郎王茂先奏九月十三日卯時有羣賊入州城打開軍資庫甲仗庫般運出衣甲物帛散與賊衆及貧民等知州以下只領當直兵士二十四人關敵不住州官走出城外任賊劫掠直至未時以來方始出城臣謂賊勢轉盛深可憂虞臣前歲曾陳備賊之策正為今日之事今來累有羣賊白日入城開軍資等庫劫取衣甲物帛散與賊黨州中兵士不滿三十人州官散走賊徒恣行劫殺殊無畏憚官司勢不能制禦臣前歲

所陳只是過為隄防萬一或有此事不意今來便至如此小寇聚集尚陵侮朝廷臣決知自後更有大盜殺官吏據州城盡取官私財物召募徒衆必千萬人且賊頭稱王稱朕與朝廷相抗大劫財物散施無涯則貧民樂隨矣恣行劫殺務要震恐則小大脅從矣朝廷賞必有限罰必有條不得如賊之使人樂隨而脅從也若諸處觀望奸雄相應而起賊滿天下則大事去矣秦末隋末唐末皆由此而亂臣夙夜思念實為寒心臣伏以西賊

未叛以前諸處雖有盜賊未嘗有敢殺戮官吏者自四
五年來賊殺都巡檢縣尉官者約五六十員又西賊未
叛以前諸處雖有盜賊未嘗敢入州城行劫自四五年
來賊入州縣打劫者約三四十州向來入城尚皆暮夜
竊發潛形往來今則白日公行擅開府庫其勢日盛一
日自此以往只有轉盛若不早為隄備事未可知臣前
歲所上備賊之策當時不曾施行近日因兩府奏事論
及淮南賊盜陛下問臣前策臣次日再錄一本進呈訖

然臣策只是備兵聚東南九路及京東一路今據金州
奏在城只有兵士二十四人顯是無備致盜生心今并
京西一路亦於要害聚兵為州郡聲援今諸處賊盜已
盛方思設備已是後時若又遷延則無所及伏乞速賜
施行

五年弼知壽州兼京東路安撫使乞採訪京東狂謀之
士疏曰臣近曾親書劄子聞奏見察訪民間恐有暗行
結扇不徒驚劫別蓄奸謀如劉沓之類者候見的實別

具申奏次臣後來察訪京東一路甚有兇險之徒始初讀書即欲應舉洎至長立所學不成雖然稍能文詞又多不近舉業仕進無路心常怏怏頗讀史傳粗知興亡以至討尋兵書習學武藝因茲長大冒膽遂生權謀每遇災祥便有竊議自以所圖甚大蔑視州縣既不應舉又不別營進身所臨之官無由肯見往往晦名詭姓潛迹遁形唯是兇徒密相結扇或遇饑歲必有竊發臣恐此輩一作卒難剪除縱無成謀亦能始禍似此輩類的

實甚多散在民間但未發耳又緣不希仕進難以牢籠不可捕而加刑加刑則黨類驚而速為也不可縱而稔惡稔惡則根株成而難去也要在得而縻之使兇謀不能成此竄上也欲乞批下於此一路中擇三兩處臣寮可委者密令多方採訪如知姓名居處作草澤遺逸以禮呼召薦于朝廷隨其所能量加恩命則奸謀不能成矣或得稍優者量加異待則徒黨聞之未必不冀望而出因而收拾或可畧盡若以此輩不作其他盜賊雖遇

飢年蜂起不足為慮也伏望陛下深切留意於此不可忽也

八年弼乞選任轉運守令以除盜賊疏曰臣伏見西鄙用兵以來騷動天下物力窮困人心怨嗟朝廷不能撫存遂使聚而為盜今張海郭貌山等數火驚擾州縣殺傷吏民恣凶殘之威洩憤怒之氣巡檢縣尉不敢向前遂從京師遣兵仍令中使監督尚猶遷延日月倔强山林以至白晝公行平入州縣開發府庫劫取貨財散募

凶徒嘯聚漸衆陝西南京唐汝均房金商襄鄧相去凡
千餘里殺人放火所在瘡痍賊一經過六親不能相保
人民恐懼道路艱難每郡無兵各不自保若大段結集
攻陷諸州緩急亦未有所以備之之策賊既轉盛不可
不防秦末隋末唐末諸寇或起於畎畝或起於商客或
起於士卒或起於負擔其初起莫不甚微尚不得如張
海郭貌山輩如此其盛然以小合大漸成巨盜縱橫難
制遂亂天下今茲賊黨未見剪除所宜多設隄防以備

滋蔓臣前日曾具劄子奏乞於京西路擇要害數州屯聚兵馬以為諸處聲援此最急務宜速施行臣又思京西諸州長吏皆非其人如襄鄧唐汝均房金商安郢等十餘州盡是賊盜見今往來之處長吏尤須得人伏乞先選轉運兩人徑令往彼體量諸州長吏不才及賊濫老病者急罷之便令於轄下通判或知縣中保舉權充知州如不足則朝廷下審官院選差人填補知州得人則就令選郡內知縣縣令昔前漢宣帝時渤海郡盜起

帝選能治之人丞相舉龔遂遂至郡盜賊悉平後漢安
帝時朝歌縣盜賊屯聚連年未獲乃以虞詡為朝歌長
賊遂駭散此是兩漢時一郡一縣有賊只得龔遂虞詡
兩人為守宰自然破滅之驗也今且以上項襄鄧等十
餘州論之其知州知縣縣令皆庸謬懦怯尋常之人盜
賊所到如入無人之境巡檢縣尉又一一不堪驅使賊
不猖狂自恣復何為哉臣竊謂非盜賊果能強盛自是
朝廷只守弊法不肯更張唯恐不才不賢者怨恨不早

罷去故以州縣委賊任賊殘害臣謂盜賊之起已是遲
矣若以朝廷自來處置次第早合賊滿天下但為宗社
有靈陛下仁德所感故未至如此然今盜賊已起乃是
徧滿天下之漸若朝廷依舊避人怨恨不早更張臣恐
賊盜愈多竊據州縣或稱將軍或稱太尉或稱王或稱
帝兵戈四起所在僭偽事到如此生靈如何社稷如何
朝廷守此一城還得安穩否況今來不同漢唐都關中
洛陽各有險固可恃緩急有變用兵守險亦未能便至

危窘尚自明皇德宗俱曾播越唐室危若贅旒者數矣
今來都城並無險固所謂八面受敵乃自古一戰場爾
若四方各有大盜朝廷力不能制漸逼都城不知何以
為計臣每念及此不寒而戰臣又伏思古者亂離無世
不有然而傾亡至速者亦各不下三五十年唯唐室之
後凡更五代十二帝共只得五十四年國祚短促自古
未之有也其故何哉蓋是都城在四戰之地並無險固
四方有變直到城下畧無障礙之所致也唯是王者能

鎮撫天下常使安寧災害不生賊盜不作則是都城也
且保無虞故大宋之興實賴太祖英武之才平定禍亂
盡削方鎮兵權只用文吏守土及將天下營兵縱橫交
互移換屯駐不使常在一處所以壞其凶謀也又賴太
宗相繼剋復諸國一統天下更賴真宗為民屈己與北
敵西戎議通和好故能八十餘年都城無事海內富庶
不用干戈雖是人謀亦有天幸今則西戎已叛屢喪邊
兵北敵愈強且增歲幣國用殫竭民力空虛徭役日繁

率斂日重官吏猥濫不思澄汰人民疾苦未嘗省察百姓無告朝廷不與為主不使叛而為寇復何為哉朝政不舉都城無依五代事迹已復萌露艱虞之運正在今日須是君臣上下同心協力廢寢忘食夙夜整救則數年之內或致小康若猶因循苟且尚務偷安不練人謀只求天幸臣恐五代之禍不旋踵而至矣臣因論京西盜賊遂至理亂憂懼所迫不覺切至陛下便賜萬死亦所甘心臣所乞選京西轉運使知州知縣不可稽緩蓋

擾攘之際全藉有才謀轉運使往來按察經營又藉逐處知州知縣守護城池安集百姓及設方畧驅除寇盜其餘有朝廷意所不到指揮不及者其良守宰必自能就便處置不至失所州縣既各得一人又得要郡所屯之兵犄角救應則盜賊不難擒捕矣至於巡檢縣尉亦可並委轉運知州揀選不煩朝廷費力此策最為簡要無可疑難京西既行次及諸路變故或起倉卒設備皆不可遲朝廷但能不務因循不避怨謗天下之事未有

不可為者所有諸路揀退不才及賊濫老病轉運知州知縣縣令等仰只在元守官處聽候朝旨朝廷只就外指揮更不令赴闕仍乞檢會臣前奏相度施行

慶歷五年翰林學士張方平上言曰西疆征戍未解天下州郡兵累次料揀赴京江淮已南空虛尤甚無復武備日來逐處盜賊連結剽劫城鎮聲勢甚張至今不能誅擒自古盜賊之擾攘不啻四夷之患漢唐之事為鑒不遠國家創五代之亂削方鎮之權誠為強幹弱枝之

術及茲敝也無臂指相為用之勢通都大邑吏守空城而已慢藏之悔不可不慮今諸道提舉兵甲司向來領為虛名但朝廷稍付事權則猶有古者方面之制應提舉兵甲州軍乞慎選良吏而為除本路鈐轄一員各令本路募兵量其山川險易封畧遠近而約置兵之數常令教閱務為精練朝廷更不行抽揀本道亦不得間雜差使遠出其一路巡檢使臣縣尉諸捕盜官吏使得察廉其能否勇怯而升黜之所部郡縣強惡之民累犯罪

禁者械送本司酌情法移配有寇盜結集之處量其勢力督遣巡檢等領兵甲捕逐若賊羣黨稍衆則本路鈐轄親督吏兵會合掩殺漢制刺史太守率以盜賊分數為最負其賞罰條目乞自朝廷比議指揮所冀郡縣武備氣勢相應萑苻不逞望風知懼肅清盜賊消弭厲階方平又上奏曰臣前在諫院累曾論郡縣武備所陳意見朝廷未加精察比來軍興多事賦役煩數顧亦天幸而屢有年姦游之民猶聚為盜至擁旗鼓入城邑殺吏

堂堂無所憚不幸歲洊饑民艱食勢必羣聚蜂起為盜或數輩匿村間至聚吏兵千計縣鄉為之殘敝而不能時擒即氣燄稍盛兵連禍結豈在敵國也漢唐之大業未嘗無四夷之患至或長驅而犯宮闕然無害於根本之固及黃巾巢賊竟以大壞天下國家創艾五代之亂藩鎮不得擅兵常番禁旅外屯州郡乃自近歲悉還戍邊其州郡兵之壯者亦率點選配諸禁衛所餘乃罷弱羸卒供雜役使官吏導從而已豈知執兵之事今愚細

之民知窺此隙故昨王倫等賊起沂州並淮渡江歷數
千里若蹈無人地乃始下京師之甲而趨躡之使民間
而有姦桀豈不生易朝廷之心歟伏以先朝置諸道提
舉兵甲司所以專督盜賊抑有經遠之旨粗存方面之
制比來忽畧領為虛名今能稍付事權自可外張形勢
計諸藩郡有兼提舉兵甲處其為要地自用重臣鎮守
自餘地望稍輕亦領此名者不過七八誠選用有風望
方畧之士以任長吏各於本路除鈐轄或都監一員量

其路分輕重提封近遠約置兵之數令於本郡及所部
州軍見兵中選取壯強集成指揮因昨所置武衛為名
而廩給之若見管兵籍取不足則令招募及數明降朝
旨更不揀選調發赴邊亦不得輒差遠出內有逃亡隨
即完補所有器甲必令精良每道選差班行使臣一兩
人或令長吏薦舉比監押巡檢資叙專管教閱若所部
郡縣有寇盜結集之處即量事勢發卒赴應使之統領
追捕其所捕州軍都監監押巡檢縣尉諸督盜官吏令

得察廉其能否勇怯以聞而升黜之若所部郡縣強惡
奸蠹之民得以檢察追逮按情科罪移配遠方若賊羣
黨稍衆鈐轄都監親督吏卒會合掩殺自餘賞罰科條
更自朝廷比議指揮如此則不惟壯郡縣武備抑稍復
方鎮事體庶以式遏寇虐消除暴害

仁宗時侍讀學士宋祁奏曰臣伏見近年諸處盜賊結
連黨與州縣不能擒制雖有巡檢縣尉皆畏懦不肯公
心以時捕捉臣愚以為縣尉巡檢既非其人而國家立

法又不嚴切是使上下因循更相推避盜賊知其如此故多行賕賂却與兵士弓手陰相聞知打劫之時先為耳目只如臣在壽州日京東透過賊十四人入界其時五員巡檢四員縣尉合兵士八九百人終無一人用心向前捉賊賊入州界九日凡八處打劫臣曾具此奏聞乞行嚴斷臣後來探知只是等第降却差遣若國家只如此行法如何使官吏用命盜賊畏威譬如鳴佩以救焚卜日而拯溺沈淪焦爛終無全理臣愚以為今後應

有賊發去處如係羣黨十人以上或雖不及十人但有器械甲冑不畏州縣明行劫掠者本處巡檢縣尉並令兵士弓手明立部伍結陣鬪敵多設方畧粘趨前後勿令走透或力有未勝仍逐村拘集耆壯分頭設伏圍掩如更敢公然畏避放縱賊徒不能擒制並乞所屬州軍攝送司理院枷禁勘奏取朝廷指揮並行停替於遠地編管仍委長吏逐急別選在州有心力曹官職官縣令主簿監當使臣交割兵甲一面追捕盜賊所差權官賞

罰進退一如正官取進止

范仲淹奏乞召募兵士捉殺張海等賊疏曰臣竊見鄧州奏賊人張海等一行已及六千餘人各騎鞍馬有弓弩器械驚劫縣鎮恣取金帛強掠士女不懼朝廷凶虐如此百姓被害不堪其憂臣恐逐處窮民見其豪盛各生健羨聚成徒黨脅取州縣事勢漸次張大不早殄滅必生他患漢唐之末皆因羣盜而天下大亂朝廷豈得安然伏乞聖慈來日便差中使計會殿前馬步軍司於

七百料錢已下軍分内幕情願捉殺強賊人員兵士三百五人須是勇壯喫得辛苦或曾經使喚之人限一兩日內引見面賜盤纏錢并冬寒綿衣及大與逐月添支選差有心脅使臣部押與謝雲行同去分布掩殺不以遠近粘趁直候捉殺淨盡即等第優與酬獎

知諫院包拯上疏曰臣竊見廣南東路鈐轄司奏據連州申勘到行者孫之道稱蠻賊三千餘人商量入連州打劫勘會彼中兵甲數少已差奉職周僧辨帶兵甲一

百人前去防托者緣廣南英韶連賀四州並與湖南郴衡道永等州相接自蠻賊騷動以來彼處稍有備擬鹵畧無得賊計必謂嶺南無備有侵軼之意兼聞八月九日蠻賊五百餘人打劫連州桂陽縣兩村人戶財物牛馬不少今來賊勢轉盛所差兵級數少必難枝梧況廣南州郡並無城壁及攻守之具加之兵力綿薄無堪用者若不速議措置使此賊得便乘虛深入曷以禦之欲望聖慈特降指揮下本路轉運鈐轄司令於逐州界

首可控扼之處相度添置寨柵屯兵防托以警備之不然恐為患轉大貽朝廷之深慮也

拯請速除京東盜賊疏曰臣竊見江淮兩浙京東河北累年以來旱澇相繼物價涌貴民食艱阻兩浙一路災疫尤甚雖朝廷寬免租賦優加賑卹而迄今未得蘇息近聞京東濟鄆河北德博淮南宿毫等州盜賊充斥所在竊發州縣不時擒捕頗甚兇猛蓋長吏與巡檢縣尉罕得其人上下蒙蔽不以實聞必恐稔成大患為朝廷

深憂不可不速行處置也頃歲浙東鄂鄰淮南王倫京西張海等皆起自倉卒結為巨盜劫害居民郡邑悉不能制禦幸而殲滅無謂邾小蜂蟻有毒且四方藩郡兵伍絕少多者不逾數百輩皆廝役羸卒又驕惰難用寬之則逾慢急之則生禍身不更訓練目不識行陣驅之禦寇必先事而敗雖烏合嘯聚莫能久長而生靈塗炭矣則國家將何道而猝安之況今國用窘急民心危懼凡盜賊若不即時誅滅萬一無賴之輩相應而起胡可

止焉伏望陛下督責有司精擇逐路按察之官及諸州
長吏有不任職者即令黜罷其巡檢縣尉等並委安撫
轉運提點刑獄司專切舉察如庸懦不才者速具體量
衝替應有盜賊不以多少遠近並須捕捉淨盡免成後
害或少涉弛慢並乞重行朝典

知杭州司馬光論兩浙不宜添置弓手狀曰臣竊觀兩
浙一路與他路不同臣謹條列添置弓手不便事件如
左伏惟聖恩省察少加詳擇焉當今西戎梗邊三方皆

聳人心易動當務安之一旦異常詔書大加調發擐甲
執兵學習戰陳置指揮使節級等名目頗似軍法以為
欲效河北陝西沿邊鄉兵謂國家以權計點之假名捕
盜漸欲收為卒伍戍守邊防吳人輕怯易惑難曉道聽
塗說衆情鼎沸至欲毀體捐生竄匿山澤臣雖明加告
諭嚴行止約愚民無知不可戶說誠恐差點之後搖動
生憂其不可一也吳越素不習兵以故常少盜賊不過
聚結朋黨私販茶鹽時遇官司往往鬪敵在於兩浙最


為劇賊然皆權時利合事訖則散不能久相屯結又無
鉅利兵器止偷商稅不敢剽掠平人近年以來雖亦頗
有強盜然比諸內地要自稀疎今避差點者若竄匿無
歸必致為寇加以弓矢刀戟之類許其私置自今以後
賊盜必多及私販茶鹽之徒皆有利兵抗拒吏士益難
擒討積微至著漸不可長其不可二也姦吏貪饕惟利
是務不畏法令不顧公議幸得因緣惟喜多事今計杭
州管界當差若干人他州比率大凡有幾縣胥里長於

茲相慶民既憂愁而又脅之煩苦不安而又擾之所規
自潤豈顧其外雖朝廷重為懲禁特倍常科長吏勞心
不能悉察厚利所誘死亦冒之加以版籍差誤戶口異
同毫釐不當互相告訐追呼無時獄訟不歇則民未暇
為公上給役而先困於貪吏之誅求矣此之騷擾勢不
能免其不可三也民皆生長畎畝天性慇懃所知不過
播種之法所識不過耒耜之器加之吳人駕弱天下所
知一旦使棄其所工學所不能徒煩教調終無所成就

其有成不堪施用則是虛有煩費而與不添置無異其不可四也吳子壽夢以前世服於楚自申公巫臣得罪于楚逃奔于晉為晉聘吳教之乘車教之戰陳其後楚人戎車歲駕早朝晏罷奔命不息以至吳亡自是以來號稱輕狡遠則劉渾近至錢鏐其間承風倔強無數豈唯其人之跋扈亦由習俗之樂亂也幸賴祖宗之馴致陛下之敦化至德之醲淪於骨髓暴亂之風移變無迹此皆上天降祐前世所不能庶幾者也今忽無故黷玩

患之兆臣恐其久非國家之至便所以萬全而無害其
不可五也方今兩浙雖水旱稍愆未至流殍閭閻無事
盜賊不添縱使有之舊來吏士隨發擒討甚有餘力不
假更求正恐平居興役有害無益而已臣職忝密近官
備藩方不敢默然理須上列伏望陛下特令兩浙一路
更不添置或以事須過防舊人太少則乞只依近降勅
命量加添補更不立指揮使等名目閱習諸事一如舊

規貴得衆情大安別無生事



歷代名臣奏議卷三百十七